



Broj: 01/V - 44 - 15163/13
Datum, 28.11. 2013. godine

Na osnovu člana 29. tačka 1. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine F BiH", broj 39/03, 22/06 i 43/10), člana 24. i 118. Statuta općine Cazin („Službene novine općine Cazin“ broj:13/10) i člana 113. Poslovnika o radu Općinskog vijeća („Službene novine općine Cazin“ broj:1/11) Općinsko vijeće općine Cazin na redovnoj XIII sjednici, održanoj dana 28.11.2013. godine, donosi,

O D L U K U
O ORGANIZOVANJU I FUNKCIONISANJU ZAŠTITE I SPAŠAVANJA LJUDI I
MATERIJALNIH DOBARA NA PODRUČJU OPĆINE CAZIN

I - OSNOVNE ODREDBE

Član 1.

Ovom odlukom se utvrđuje organizacija i funkcionisanje sistema zaštite i spašavanja ljudi i materijalnih dobara od prirodnih i drugih nepogoda, tehničko – tehnoloških, ekoloških i drugih nesreća ili ratnih opasnosti na području općine Cazin.

Član 2.

Organizacija i funkcionisanje sistema zaštite i spašavanja ljudi i materijalnih dobara od prirodnih i drugih nepogoda, tehničko – tehnoloških, ekoloških i drugih nesreća ili ratnih opasnosti ostvaruje se putem civilne zaštite koja predstavlja organizirani oblik zaštite i spašavanja ljudi i materijalnih dobara od prirodnih i drugih nesreća.

Član 3.

Jedinstvena organizacija zaštite i spašavanja, prema Zakonu i ovoj Odluci, ostvaruje se organizovanjem i poduzimanjem sljedećih mjera i aktivnosti:

- 1) otkrivanje, praćenje i sprečavanje opasnosti od prirodnih i drugih nesreća;
- 2) obavještanje stanovništva o opasnostima i davanje uputstva za zaštitu i spašavanje;
- 3) obučavanje i osposobljavanje za zaštitu i spašavanje;
- 4) organizovanje, opremanje, obučavanje i osposobljavanje civilne zaštite i uspostavljanje i održavanje drugih vidova zaštite i spašavanja;
- 5) mobilizacija i aktiviranje snaga i sredstava za zaštitu i spašavanje;
- 6) otklanjanje posljedica prirodnih i drugih nesreća, do osiguranja osnovnih uslova za život;
- 7) nadzor nad provođenjem propisa o zaštiti od prirodnih i drugih nesreća;
- 8) pružanje pomoći općinama Unsko – sanskog kantona u slučaju prirodne ili druge nesreće;
- 9) traženje pomoći od općina Unsko – sanskog kantona, Unsko – sanskog kantona i Federacije Bosne i Hercegovine.

Član 4.

Mjere i aktivnosti iz člana 3. ove Odluke ostvaruju se putem Civilne zaštite (u daljem tekstu: CZ-e).

II- NADLEŽNOST OPĆINSKIH ORGANA VLASTI

1. Nadležnost Općine

Član 5.

U ostvarivanju prava i dužnosti u oblasti zaštite i spašavanja, Općina:

- 1) donosi Odluku o organizovanju i funkcionisanju zaštite i spašavanja na području Općine i osigurava njeno provođenje u skladu sa Zakonom i drugim propisima;
- 2) donosi Program razvoja zaštite i spašavanja Općine od prirodnih i drugih nesreća;
- 3) planira i utvrđuje izvore finansiranja za izvršavanje poslova zaštite i spašavanja iz svoje nadležnosti;
- 4) organizuje Operativni centar CZ-e u Općini, u skladu sa Zakonom i osigurava njegovo funkcionisanje;
- 5) donosi akte o osnivanju OpŠCZ-e, postavljenju komandanta, načelnika štaba i određivanju funkcija u Općinskim službama za upravu i Službi CZ-e, čiji su nosioci po položaju članovi OpŠCZ-e;
- 6) donosi Plan zaštite i spašavanja Općine od prirodnih i drugih nesreća;
- 7) proglašava stanje prirodne i druge nesreće i naređuje upotrebu snaga i sredstava CZ-e, službi za upravu, privrednih društava i drugih pravnih lica sa područja Općine, na prevenciji, ublažavanju i otklanjanju štetnih posljedica od prirodnih i drugih nesreća po ljude i materijalna dobra.
- 8) vrši i druge poslove zaštite i spašavanja u skladu sa Zakonom, drugim propisima i općim aktima.

2. Općinsko vijeće

Član 6.

U ostvarivanju prava i dužnosti u oblasti zaštite i spašavanja, Općinsko vijeće:

- 1) donosi Odluku o organizovanju i funkcionisanju zaštite i spašavanja na području Općine i osigurava njeno provođenje;
- 2) donosi Program zaštite i spašavanja Općine od prirodnih i drugih nesreća;
- 3) planira i utvrđuje finansijska sredstva za izvršavanje poslova zaštite i spašavanja, u okviru budžeta Općine,
- 4) razmatra stanje zaštite i spašavanja na području Općine i utvrđuje mjere za razvoj i usavršavanje zaštite i spašavanja od prirodnih i drugih nesreća.

3. Općinski načelnik

Član 7.

U ostvarivanju prava i dužnosti u oblasti zaštite i spašavanja, Općinski načelnik:

- 1) organizuje Općinski operativni centar CZ-e, u skladu sa Zakonom, drugim propisima i ovom Odlukom, i osigurava njegovo funkcionisanje;
- 2) donosi akte o osnivanju Općinskog štaba civilne zaštite
- 3) donosi akte o postavljenju komandanta i načelnika OpŠCZ-e i određivanju funkcija u Općinskim službama za upravu, čiji su nosioci po položaju članovi OpŠCZ-e;
- 4) donosi akte o postavljenju komandanta, načelnika štaba i članova štaba u štabovima CZ-e koji se obrazuju u mjesnim zajednicama, u skladu sa ovom Odlukom;
- 5) donosi Procjenu ugroženosti područja Općine od prirodnih i drugih nesreća;
- 6) donosi Plan zaštite i spašavanja od prirodnih i drugih nesreća Općine;
- 7) proglašava stanje prirodne i druge nesreće i naređuje upotrebu snaga i sredstava CZ-e, službi za upravu, privrednih društava i drugih pravnih lica sa područja Općine, na prevenciji, ublažavanju i otklanjanju štetnih posljedica od prirodnih i drugih nesreća po ljude i materijalna dobra na području Općine;
- 8) proglašava prestanak prirodne i druge nesreće na području Općine;
- 9) na prijedlog Službe za civilnu zaštitu, donosi akte o formiranju jedinica i imenovanju povjerenika civilne zaštite u naseljima i službama za upravu i određuje pravna lica u kojima se formiraju službe zaštite i spašavanja,
- 10) naređuje mobilizaciju građana i njihovih sredstava i sredstava pravnih lica, samostalnih privrednika, državnih organa, kao i jedinica, štabova, povjerenika i službi za zaštitu i spašavanje.

4. Općinske službe

Član 8.

Općinske službe u okviru svojih prava i dužnosti, utvrđenih Zakonom, Statutom Općine i drugim propisima koji regulišu redovnu djelatnost istih, u oblasti zaštite i spašavanja:

- 1) organizuju, planiraju i osiguravaju provođenje preventivnih mjera zaštite, za zaštitu vlastitog ljudstva, materijalnih sredstava i objekata koje koriste u svom radu;
- 2) učestvuju u izradi Procijene ugroženosti za područje Općine, Općinskog programa razvoja i Općinskog plana zaštite i spašavanja, u pitanjima iz oblasti za koju su osnovani, u okviru svoje redovne djelatnosti realiziraju zadatke koji se za njihove oblasti utvrde u tim dokumentima;
- 3) planiraju, organizuju i provode preventivne mjere zaštite i spašavanja ljudi i materijalnih dobara iz svoje oblasti, za koju su osnovane.
- 4) planiraju, organizuju i provode mjere koje naredi OpŠCZ-e, koje se odnose na angažovanje službi zaštite i spašavanja, privrednih društava i drugih pravnih lica u zaštiti i spašavanju;

- 5) obavještavaju Službu CZ-e o podacima koji su od značaja za planiranje, organizovanje i provođenje zaštite i spašavanja ljudi i materijalnih dobara iz nadležnosti Općine;
- 6) učestvuju u izradi elaborata za izvođenje zajedničkih i samostalnih vježbi zaštite i spašavanja;
- 7) prate stanje zaštite u oblastima za koje su osnovani i predlažu mjere za razvoj i unapređenje zaštite;
- 8) vrše i druge poslove u oblasti zaštite i spašavanja u skladu sa Zakonom, drugim propisima i općim aktima.

Općinske službe i organi uprave dužni su da zadatke iz stava 1.ovog člana, razrađuju u svojim planovima rada.

5. Služba za civilnu zaštitu

Član 9.

Upravne, stručne i druge poslove zaštite i spašavanja, iz nadležnosti Općine, vrši Služba CZ-e, koja ima status Općinske službe za upravu.

Služba CZ-e, u oblasti zaštite i spašavanja, obavlja slijedeće poslove:

- 1) organizuje, priprema i provodi zaštitu i spašavanje na području Općine;
- 2) izrađuje Procjenu ugroženosti za područje Općine;
- 3) priprema Program razvoja zaštite i spašavanja od prirodnih i drugih nesreća u Općini;
- 4) predlaže Plan zaštite i spašavanja od prirodnih i drugih nesreća u Općini;
- 5) prati stanje priprema za zaštitu i spašavanje i predlaže mjere za unapređenje organizovanja i osposobljavanja CZ-e;
- 6) organizuje, izvodi i prati realizaciju obuke građana na provođenju lične i uzajamne zaštite;
- 7) organizuje i koordinira provođenje mjera zaštite i spašavanja, organizuje i provodi poslove zaštite i spašavanja i vatrogastva, predlaže program samostalnih vježbi i izrađuje elaborate za izvođenje vježbi CZ-e u Općini;
- 8) organizuje Općinski operativni centar CZ-e i obezbjeđuje njegov rad;
- 9) vrši popunu ljudstvom štabova CZ-e, službi zaštite i spašavanja i jedinica CZ-e, određuje povjerenike CZ-e i osigurava njihovo opremanje materijalno-tehničkim sredstvima, organizuje, izvodi i prati realizaciju njihove obuke;
- 10) priprema propise iz oblasti zaštite i spašavanja iz nadležnosti Općine;
- 11) vodi propisane evidencije i vrši druge poslove zaštite i spašavanja u skladu sa Zakonom, drugim propisima i općim aktima.

6. Mjesne zajednice

Član 10.

Mjesna zajednica, u okviru svojih prava i dužnosti, u organizovanju i ostvarivanju zaštite i spašavanja od prirodnih i drugih nesreća, naročito:

- 1) organizuje i osposobljava građane za sprovođenje zadataka i mjera zaštite;

- 2) planira i organizuje mjere zaštite;
- 3) planira i organizuje radne jedinice od svih građana i provodi njihovu mobilizaciju radi učešća u zaštiti;
- 4) organizuje i obezbjeđuje prihvata i zbrinjavanje evakuisanih građana i materijalnih dobara;
- 5) organizuje i održava red za vrijeme prirodne i druge nesreće;
- 6) obezbjeđuje informisanost građana o opasnostima od prirodnih i drugih nesreća, posljedicama i mjerama koje se preduzimaju na zaštiti i otklanjanju posljedica;

U organizovanju, planiranju i ostvarivanju zaštite i spašavanja, mjesna zajednica saraduje se Opšćinima, susjednim mjesnim zajednicama i preduzećima na svom području o pitanjima od zajedničkog interesa, i u tom pogledu, mogu udruživati snage i sredstva za zaštitu od prirodnih i drugih nesreća na području mjesne zajednice.

Član 11.

Mjesna zajednica, u Statutu ili drugom općem aktu, uređuje način organizovanja i ostvarivanja zaštite i spašavanja na području mjesne zajednice, utvrđuje nadležnost organa mjesne zajednice i način angažovanja građana u zaštiti i spašavanju.

III ORGANIZACIJA CIVILNE ZAŠTITE

Član 12

Civilna zaštita obuhvata:

- ličnu i uzajamnu zaštitu građana;
- mjere zaštite i spašavanja;
- štabove civilne zaštite;
- povjerenike civilne zaštite;
- jedinice civilne zaštite;
- službe zaštite i spašavanja;
- rukovođenje i upotrebu snaga i sredstava civilne zaštite.

U organizaciju civilne zaštite spada i Služba civilne zaštite općine Cazin (u daljem tekstu: Služba civilne zaštite) koja pored drugih poslova obavlja i stručne, administrativne, tehničke i druge poslove neophodne za rad Općinskog štaba civilne zaštite, što se bliže određuje Zakonom o zaštiti i spašavanju ljudi i materijalnih dobara od prirodnih i drugih nesreća (u daljem tekstu: Zakon) i drugim propisima.

1. Lična i uzajamna zaštita građana

Član 13

Lična i uzajamna zaštita građana predstavlja najvažniji oblik pripremanja i organizovanog učešća građana u zaštiti i spašavanju. Ta zaštita se ostvaruje u stambenim zgradama, javnim i drugim objektima, naseljima i pravnim licima, provođenjem Odluke o vrsti i minimalnim količinama sredstava potrebnih za provođenje lične i kolektivne zaštite građana i zaposlenika u poslovnim objektima i stambenim zgradama od prirodnih i drugih nesreća („Službene novine F BiH 39/3 i 58/06).

Lična i uzajamna zaštita obuhvata naročito: obuku građana, mjere i postupke

preventivne zaštite, prvu pomoć, samopomoć, zbrinjavanje djece i nemoćnih lica i druge hitne intervencije u zaštiti i spašavanju ljudi i materijalnih dobara.

Ličnu i uzajamnu zaštitu provode građani, gdje žive i rade, u okviru prava i dužnosti utvrđenih Zakonom.

2. Mjere zaštite i spašavanja

Član 14.

U cilju provođenja zaštite i spašavanja ljudi i materijalnih dobara od prirodnih i drugih nesreća, na području općine Cazin, provode se slijedeće mjere: sklanjanje ljudi i materijalnih dobara, evakuacija, zbrinjavanje ugroženih i stradalih, zamračivanje, zaštita i spašavanje od radioloških, hemijskih i bioloških sredstava, zaštita i spašavanje od rušenja, zaštita i spašavanje od požara, zaštita od neeksplozivnih ubojnih sredstava, prva medicinska pomoć, zaštita i spašavanje životinja i namirnica životinjskog porijekla, asanacija terena, zaštita okoliša, zaštita bilja i biljnih proizvoda.

Član 15.

Mjere zaštite i spašavanja predstavljaju organizovane radnje i postupke preventivne i operativne prirode na:

- prevenciji
- postupcima pri sprovođenju mjera civilne zaštite i
- otklanjanju i ublažavanju posljedica prirodnih i drugih nesreća.

Član 16.

Mjere i postupci zaštite i spašavanja utvrdit će se planovima zaštite i spašavanja od prirodnih i drugih nesreća.

Općinske planove zaštite i spašavanja izrađuje Sužba civilne zaštite u saradnji sa službama Općine, ovisno o oblasti koje su u njihovoj nadležnosti.

3. Štabovi civilne zaštite

Član 17.

U općini Cazin osniva se Općinski štab civilne zaštite (u daljem tekstu: Općinski štab) kao stručno - operativni organ za rukovođenje akcijama zaštite i spašavanja svih učesnika angažiranih na zaštiti i spašavanju na području općine Cazin.

Član 18.

Općinski štab se sastoji od: komandanta, načelnika i članova štaba.

Komandant općinskog štaba civilne zaštite po položaju je Općinski načelnik.

U njegovom odsustvu mijenja ga lice koje on imenuje svojim rješenjem, a u skladu sa Zakonom.

Pomoćnik općinskog načelnika za Službu civilne zaštite po položaju je načelnik Općinskog štaba.

Sekretar općinske organizacije Crvenog križa, po položaju je član Općinskog štaba.

Za članove Općinskog štaba postavljaju se rukovodeći službenici općinskih službi, javnih ustanova i javnih preduzeća i službenici i namještenici službe civilne zaštite u skladu sa aktima o unutrašnjoj organizaciji Općinskog štaba, kojeg donosi Općinski načelnik na prijedlog službe civilne zaštite i isti su odgovorni za planiranje i provođenje mjera zaštite i spašavanja, za oblasti koje predstavljaju.

Član 19.

Komandanta, načelnika i članove Općinskog štaba postavlja i razrješava Općinski načelnik.

Općinski štab vrši poslove iz svoje nadležnosti samostalno i za svoj rad je odgovoran Općinskom načelniku.

Član 20.

U mjesnim zajednicama koje imaju više od 2000 stanovnika osniva se Štab civilne zaštite mjesne zajednice kao stručno - operativni organ za rukovođenje akcijama zaštite i spašavanja svih učesnika angažiranih na zaštiti i spašavanju, na području mjesne zajednice.

U mjesnim zajednicama u kojima nije formiran štab civilne zaštite akcijama zaštite i spašavanja rukovodi savjet mjesne zajednice.

Član 21.

Štab civilne zaštite mjesne zajednice sastoji se od: komandanta, pomoćnika za operativno-stručne poslove, pomoćnika za mjere zaštite i još dva člana.

Komandant štaba civilne zaštite mjesne zajednice po položaju je jedan od članova savjeta mjesne zajednice.

Članovi štaba moraju imati stručne, moralne i druge kvalitete, koje će im omogućiti uspješno obavljanje poslova iz nadležnosti zaštite i spašavanja na području svoje mjesne zajednice.

Član 22.

Komandanta, načelnika i članove Štaba civilne zaštite mjesne zajednice predlaže savjet mjesne zajednice, a postavlja i razrješava Načelnik općine (komandant općinskog štaba civilne zaštite).

Štab mjesne zajednice vrši poslove iz svoje nadležnosti i za svoj rad je odgovoran savjetu mjesne zajednice i općinskom štabu civilne zaštite.

Član 23.

Štabovi civilne zaštite mogu se osnivati u pravnim licima koja se nalaze na području općine Cazin u skladu sa njihovim procjenama ugroženosti.

Ako se ne osnuje štab civilne zaštite, pravna lica su dužna svojim općim aktom odrediti organ koji će rukovoditi akcijama zaštite i spašavanja u pravnom licu.

U toku vođenja akcije zaštite i spašavanja ljudi i materijalnih dobara od prirodnih i drugih nesreća, pravna lica iz stava 1. ovog člana, dužna su provoditi odluke Općinskog štaba civilne zaštite koji rukovodi akcijama zaštite i spašavanja.

Član 24.

Štabovi civilne zaštite sastaju se redovno najmanje jednom u pet mjeseci, kada je potrebno donijeti nove odluke, propise na prijedlog općinske službe civilne zaštite, onda kada nadležni organ proglasi da je nastalo stanje prirodne i druge nesreće na određenom području, odnosno kada treba preventivno djelovati prije nastanka prirodne i druge nesreće, kao i za vrijeme vježbi civilne zaštite. Štabovi civilne zaštite, u ratnim uslovima, funkcionišu stalno.

4. Povjerenici civilne zaštite

Član 25.

Povjerenici civilne zaštite određuju se u naselju, dijelu naselja, stambenim zgradama, organima uprave i službama za upravu Općine, drugim organima i ustanovama i pravnim licima u kojima se ne osniva štab civilne zaštite.

Član 26.

Povjerenici u naseljima vrše poslove koji se odnose na organizovanje i poduzimanje neposrednih mjera na učešću građana u provođenju samozaštite i učestvuju u svim aktivnostima civilne zaštite koje se provode u akcijama zaštite i spašavanja ljudi i materijalnih dobara na određenom području, odnosno u objektima za koje su zaduženi.

Povjerenici u organima uprave i drugim organima vlasti, ustanovama i pravnim licima, vrše poslove koji se odnose na organizovanje i pripremanje mjera i aktivnosti na sudjelovanju službenika i uposlenika na provođenju lične i kolektivne zaštite i mjera zaštite i spašavanja u zgradama i objektima za koje su zaduženi.

Član 27.

U zavisnosti od procjena ugroženosti mjesnih zajednica i naselja u istima se, na svakih 350-400 stanovnika, imenuje po jedan povjerenik.

Planom zaštite i spašavanja od prirodnih i drugih nesreća vrši se određivanje broja povjerenika civilne zaštite, razrada njihovih poslova i zadataka u miru, za vrijeme prirodnih nepogoda i drugih nesreća.

Član 28.

U naselju i službama za upravu općine Cazin, povjerenike postavlja i razrješava Općinski načelnik na prijedlog Službe za civilnu zaštitu.

5. Jedinice civilne zaštite

Član 29.

Jedinice civilne zaštite su samostalne desetine i vodovi opće namjene i samostalni vodovi specijalizirane namjene.

Član 30.

Samostalne desetine i vodovi civilne zaštite opće namjene formiraju se na teritorijalnom principu za mjesne zajednice i to:

- 1) Samostalne desetine za mjesne zajednice: Majetići, Miostrah, D. Koprivna, G. Koprivna, Krivaja, Polje, Pjanići, Gnjilavac, Ljubijankići, Čizmići, Vrelo, Slatina, Mutnik i Prošići.
- 2) Samostalni vodovi za mjesne zajednice: Cazin, Stijena, Čoralići, Tr. Raštela, Šturlić, Liskovac, Pećigrad, Skokovi i Ostrožac.
- 3) Za izvršavanje složenijih zadataka iz oblasti zaštite i spašavanja od požara formira se vod civilne zaštite - specijalizirane namjene, čiju okosnicu čini Profesionalna vatrogasna jedinica.

Član 31.

Komandire jedinica civilne zaštite opće namjene postavlja i razrješava Općinski načelnik na prijedlog Službe za civilnu zaštitu općine Cazin.

6. Službe zaštite i spašavanja

Član 32.

Službe zaštite i spašavanja mogu se organizovati u pravnim licima sa sjedištem na području općine Cazin iz oblasti:

- 1) zdravstva;
- 2) veterinarstva;
- 3) komunalnih poslova;

- 4) građevinarstva;
- 5) u udruženjima;
- 6) humanitarnim organizacijama;
- 7) dobrovoljnim vatrogasnim društvima.

Član 33.

Općinski načelnik, na prijedlog Službe civilne zaštite, određuje pravna lica i udruženja iz člana 32., u kojima će se organizovati služba zaštite i spašavanja u skladu sa Zakonom.

7. Rukovođenje i upotreba snaga i sredstava civilne zaštite

Član 34.

Općinski štab odlučuje o upotrebi snaga i sredstava civilne zaštite na području općine Cazin.

Aktiviranje Općinskog štaba u smislu stava 1. ovog člana, vrši Općinski načelnik na prijedlog Pomoćnika načelnika za civilnu zaštitu Općine.

Član 35.

Mobilizacija snaga i struktura civilne zaštite vrši se putem pozivne službe (Operativni centar civilne zaštite, kurirska služba i sredstva javnog informisanja).

Član 36.

Tokom akcija zaštite i spašavanja na području Općine, Štab mjesne zajednice dužan je provoditi odluke i naredbe Općinskog štaba, a Općinski štab dužan je provoditi odluke i naredbe Kantonalnog i Federalnog štaba civilne zaštite.

Član 37.

Jedinice i povjerenici civilne zaštite, službe zaštite i spašavanja, kao i sredstva civilne zaštite, upotrebljavaju se u svim vrstama opasnosti u miru i ratu, kada su ljudi i materijalna dobra ugroženi prirodnim i drugim nesrećama, kao i za vrijeme vježbi i drugih oblika obuke.

Upotreba snaga i sredstava iz stava 1. ovog člana, na zadacima zaštite i spašavanja na području Općine traje do momenta kada se ocijeni da daljnju aktivnost na obavljanju tih poslova i zadataka mogu uspješno provoditi nadležni organi i pravna lica u okviru svoje redovne djelatnosti o čemu odlučuje Općinski štab.

Član 38.

U toku vršenja poslova, iz svoje nadležnosti, komandovanje jedinicama civilne zaštite vrše komandiri tih jedinica.

Lica raspoređena u jedinice civilne zaštite dužna su izvršavati naređenja komandira jedinica civilne zaštite, u koju su raspoređena, a jedinice civilne zaštite dužne su izvršavati naređenja nadležnog štaba.

IV OPERATIVNI CENTAR CIVILNE ZAŠTITE

Član 39.

U sastavu Službe civilne zaštite, organizuje se operativni centar civilne zaštite. Operativni centri civilne zaštite obrazuju se radi stalnog prikupljanja podataka o svim vrstama pojava i opasnosti koje mogu dovesti do prirodne i druge nesreće, kao i podataka o posljedicama iste, obradu podataka i distribuciju nadležnim organima.

Operativni centar po naredbi Štaba civilne zaštite općine Cazin vrši mobilizaciju i to:

- djelomičnu
- potpunu snaga i sredstava civilne zaštite u skladu sa uputstvom za sprovođenje mobilizacije.

Član 40.

Operativni centar civilne zaštite u Općini, u miru radi, najmanje osam sati svaki radni dan.

Član 41.

U Operativnom centru civilne zaštite zaposleno je najmanje jedno lice. U slučaju prirodnih i drugih nesreća vrši se mobilizacija obveznika civilne zaštite za popunu Operativnog centra civilne zaštite do pune formacije od pet pripadnika koji rade 24 sata svaki dan do prestanka stanja proglašene prirodne i druge nesreće.

Član 42.

Operativni centar civilne zaštite prikuplja i obrađuje podatke o svim vidovima opasnosti, vrši uzbunjivanje i upozoravanje građana, prenosi naređenja Općinskog, Kantonalnog i Federalnog štaba, oglašava početak i prestanak opasnosti, prima, priprema i šalje izvještaje o poduzetim mjerama i aktivnostima nadležnim organima vlasti, susjednim općinskim operativnim centrima civilne zaštite, kao i Operativnom centru civilne zaštite Unsko-sanskog kantona, odnosno Operativnom centru civilne zaštite Federacije.

Član 43.

Sporazumno sa drugim zainteresiranim općinama, Općinski načelnik može odobriti formiranje zajedničkog Operativnog centra civilne zaštite za više susjednih općina.

Član 44.

Rad Operativnog centra civilne zaštite bliže će se urediti planovima zaštite i spašavanja od prirodnih i drugih nesreća.

V POPUNA STRUKTURA CIVILNE ZAŠTITE

Član 45.

Pripadnici civilne zaštite raspoređuju se u službe zaštite i spašavanja, jedinice civilne zaštite opće i specijalizirane namjene, štabove civilne zaštite i na mjesta povjerenika civilne zaštite.

Raspoređivanje obveznika civilne zaštite u organizovane strukture civilne zaštite, iz prethodnog stava, obavlja Služba za civilnu zaštitu koja obveznike civilne zaštite vode u svojim evidencijama.

Raspoređivanje, sadržaj i način vođenja evidencija obveznika civilne zaštite Služba za civilnu zaštitu obavlja u skladu sa Pravilnikom o sadržaju i načinu vođenja evidencija obveznika civilne zaštite, donijetog od strane direktora Federalne uprave civilne zaštite Federacije BiH, u skladu sa članom 48. Zakona o zaštiti i spašavanju ljudi i materijalnih dobara od prirodnih i drugih nesreća.

Član 46.

Formacijska struktura organizovanih snaga civilne zaštite utvrđuje se na osnovu Privremenih okvirnih ličnih i materijalnih formacija štabova, jedinica, službi i povjerenika civilne zaštite.

VI FINANSIRANJE, OPREMANJE, OBUČAVANJE I OSPOSOBLJAVANJE

Član 47.

Finansiranje potreba, po ovoj Odluci, vršit će se iz prikupljenih sredstava iz člana 180 Zakona o zaštiti i spašavanju ljudi i materijalnih dobara od prirodnih i drugih nesreća i sredstava budžeta općine Cazin, osiguranja, dobrovoljnih priloga, sredstava pravnih lica, međunarodne pomoći i drugih izvora, u skladu sa zakonom.

Član 48.

Pravna lica iz vlastitih sredstava finansiraju troškove koji se odnose na pripremu, opremanje i obuku štabova, povjerenika i jedinica civilne zaštite koje osnivaju radi zaštite i spašavanja vlastite imovine i ljudstva.

VII ZAVRŠNE ODREDBE

Član 49.

U roku od 30 (trideset) dana, od dana donošenja ove Odluke, Općinski načelnik će uskladiti svoja akta koja se odnose na formiranje štabova, jedinica i službi i imenovanja povjerenika civilne zaštite.

U roku od 90 (devedeset) dana, od dana donošenja ove Odluke Služba za civilnu zaštitu će izvršiti reorganizaciju struktura civilne zaštite, u skladu sa odredbama ove Odluke i aktima Općinskog načelnika.

Član 50.

Danom stupanja na snagu ove Odluke, prestaje da važi Odluka o organizovanju i funkcionisanju zaštite i spašavanja ljudi i materijalnih dobara od prirodnih i drugih nesreća na području općine Cazin, broj 01/V-05-3428/0 od 05.06.2004.godine („Službene novine općine Cazin“, broj; 2/04).

Član 51.

Ova odluka stupa na snagu danom donošenja, a objavit će se u "Službenim novinama općine Cazin“.

Predsjedavajući vijeća
Mustafa Ružnić